

**ACTA DERA SESSION ORDINÀRIA  
DETH PLEN DETH CONSELH DE DATA 25 D'ABRIU DE 2016**

Assistissen:

*Sindic d'Aran,*

Mgfc. Sr. Carlos Barrera Sánchez.

*Secretari,*

Sr. David Montalà i Palau.

*Conselhèrs,*

Mgfc. Sr. Luis Carlos Medina Modroño,

Mgfc. Sr. César Ruiz-Canela Nieto,

Mgfc. Sr. Francesc Medan Juanmartí,

Mgfca. Sra. Anna Díaz Morelló,

Mgfc. Sr. José Enrique Arró Cuny,

Mgfc. Sr. José Antonio Boya Quintana,

Mgfc. Sr. Francés X. Boya Alós,

Mgfc. Sr. Juan-Antonio Serrano Iglesias,

Mgfc. Sr. Amador Marqués Atés,

Mgfc. Sr. Francisco Bruna Capel,

Mgfca. Sra. Maria Vergés Pérez, e

Mgfc. Sr. José Antonio Bruna Vilanova.

En Vielha, a vint-e-cinc d'abriu de dus mil setze, en tot èster es dotze ores, ena sala de sessions dera Casa deth Senhor d'Arròs -abilitada ar efècte coma Sala de Plens- es membres nomentadi en marge, en tot assistir-i er Interventor de hons, Sr. Pere Antoni Pascual Francés.

Er objècte dera reünion ei celebrar Session Ordinària deth Plen deth Conselh Generau d'Aran e, un viatge comprovat peth secretari generau era existència de quòrum de besonh entà que pogue començar en prumèra convocatòria, ac comunique ath sindic que la declare dubèrta e publica e se procedís a balhar compde des següents punts der Orde deth dia:

1èr.- APROBACION, SE PROCEDÍS, DES ACTES DES SESSIONS ANTERIORES.-

Declarat dubèrt er acte peth sindic d'Aran, e en tot auer-se procedit cossent damb er article 110.3 deth Decret legislatiu 2/2003, de 28 d'abriu, peth quau s'apròve eth tèxte rehonut dera Lei Municipau e de Regim Locau de Catalunya, se dan per liejudes es actes corresponentes ara session ordinària de **22 de hereuèr de 2016**.

Cossent damb çò expausat, se prepausa ath Plen deth Conselh era aprobacion des actes abans nomentades.

Un còp sotmetuda a votacion e debat era aprobacion des actes corresponentes ara session ordinària de **22 de hereuèr de 2016**, s'obtien **tretze (13) vòts a favor** deth sindic e des conselhèrs Mgfc. Sr. Luis Carlos Medina Modroño, Mgfc. Sr. César Ruiz-Canela Nieto, Mgfc. Sr. Francesc Medan Juanmartí, Mgfc. Sr. Jose Enrique

Arró Cuny, Mgfca. Sra. Anna Diaz Morello, Mgfca. Sr. José Antonio Boya Quintana, Mgfca. Sr. Francés X. Boya Alós, Mgfca. Sr. Francisco Bruna Capel, Mgfca. Sr. Amador Marques Atés, Mgfca. Sra. Maria Pérez Vergés, Mgfca. Sr. Juan Antonio Serrano Iglesias e Mgfca. Sr. José Antonio Bruna Vilanova pera quau causa s'acòrde per *unanimitat* des tretze (13) membres presents deth totau de tretze que formen era Corporacion:

- Aprovar era acta dera session ordinària realizada eth dia **22 de hereuèr de 2016**.

#### 2au.- BALHAR COMPDE DES DECRETS DE SINDICATURA.-

Cossent damb çò que previé er article 42 deth Reiau decret 2568/1986, de 28 de noveme, peth quau s'apròve eth Reglament d'Organizacion, Funcionament e Regim Juridic des Entitats Locaus, se prepausa balhar compde ath Plen deth Conselh dera relacion de decrets dictadi peth sindic d'Aran des deth dia 16 de hereuèr de 2016 enquiath dia 18 d'abriu de 2016. Era relacion de decrets ei çò que seguís:

- 044 16/02/2016 Autorizacion, disposicion, reconeishment dera obligacion e ordenacion deth pagament de factura (taxa autorizacion Transit): 36,95€.
- 045 16/02/2016 Autorizacion, disposicion, reconeishment d'obligacions, aprobacion relacion de factures dera prumèra quinzea deth mes de hereuèr: 192.847,94€.
- 046 16/02/2016 Aprobacion ajuda domiciliària.
- 047 16/02/2016 Designacion deth Sr. Jèp de Montoya e Parra coma representant deth Conselh Generau d'Aran en grop de treball des Comunitats des halhes des Pirinèus.
- 048 18/02/2016 Reconeishment d'obligacion e ordenacion de pagament deth 50% deth Convèni damb es escòles entà finançar viatges extraescolars: 12.465,00€.
- 049 19/02/2016 Convocatòria session ordinària Plen deth Conselh: dia 22 de hereuèr de 2016.
- 050 19/02/2016 Concession excedècia volentària entà auer suenh dera sua hilha ara treballadora Sra. Núria Escobar Serra.
- 051 24/02/2016 Reconeishment triènni a efèctes retributius [05/01/2013-05/01/2016]: personau laborau Sra. Estefania Revilla García.

- 052 24/02/2016 Reconeixement triènni a efèctes retributius [11/01/2013-11/01/2016]: personau funcionari interin Sr. Oscar Yubero Huguet.
- 053 24/02/2016 Reconeixement triènni a efèctes retributius [26/01/2013-26/01/2016]: personau laborau Sr. José M. Cau Fogasa.
- 054 24/02/2016 Autorizacion tà personar-se en procediment de reintegrament C-364/15 deth Tribunau de Compdes.
- 055 25/02/2016 Requeriment d'incorporacion ath lòc de trebalh d'intervencion deth Conselh Generau d'Aran ath Sr. Pere Pascual Francés.  
Reingrés ath lòc de trebalh damb era categoria de tecnic/a de consum dera Sra. M. Carmen Mora Auset.
- 056 26/02/2016 Autorizacion, disposicion, reconeixement dera obligacion e pagament retribucions hereuèr 2016 personau Conselh, Adeslas, Seguretat Sociau, IRPF e MUFACE: 153.146,38€ + 3.696,80€ + 79.259,82€ + 30.104,57€ + 58,14€.
- 057 26/02/2016 1/Aprobacion ajuda urgéncia sociau: Exp. 2012/00146 per un impòrt de 400,00€.  
2/ Autorizacion, disposicion e pagament urgéncia sociau: 400,00€.
- 058 26/02/2016 Autorizacion, disposicion e pagament ajudes besonhs economics minjador [gèr 2016]: 560,20€.
- 059 29/02/2016 Autorizacion, disposicion e pagament atencions assistenciaus ara 3au edat [hereuèr 2016]: 3.080,00€.
- 060 29/02/2016 Autorizacion, disposicion, reconeixement d'obligacions e aprobacion relacion de pagament de taxes sanitàries des ramadèrs [hereuèr 2016]: 139,96€.
- 061 29/02/2016 1/Aprobacion Liquidacion Exercici 2015 Conselh Generau d'Aran.  
2/Aprobacion Liquidacion Exercici 2015 Foment Torisme Val d'Aran.  
3/Aprobacion Liquidacion Exercici 2015 Servici Aranés de Benèster e Salut.
- 062 29/02/2016 Incorporacion Romanents de Crèdit dera Liquidacion deth Conselh, Exercici 2015: 3.018.518,36€.
- 063 01/03/2016 1/Autorizacion pagament diètes, locomocion e desplaçaments hereuèr 2016 membres elèctes: 1.214,02€.  
2/Autorizacion pagament diètes, locomocion e desplaçaments

hereuèr 2016 personau eventuai: 33,22€.

3/Autorizacion pagament diètes, locomocion e desplaçaments hereuèr 2016 personau foncionari e laborau: 716,60€.

- 064 01/03/2016 Autorizacion, disposicion, reconeixement dera obligacion e ordenacion deth pagament de liquidacion ara Diputació de Lleida (taxa BOP Confederación Hidrográfica del Ebro – Refugi Artiga de Lin): 68,40€.
- 065 01/03/2016 Autorizacion, disposicion e pagament ara Sra. Laura Caubet dera matricula deth cors organizat pera Aula d'Extension Universitària dera Gent Grana d'Aran "*Comunicacion non verbau e relacions personaus*", [26/02/2016]: 35,00€.
- 066 01/03/2016 Designacion dera representacion deth Conselh Generau d'Aran en Consell de Direcció del Servei Català de la Salut.
- 067 01/03/2016 Convocatòria session extraordinària Conselh de Govèrn: dia 2 de març de 2016.
- 068 02/03/2016 Ordenar transferéncia extrapressupostària dera òbra includida en PUOSC:  
PG-MN 998/2010 Ajuntament d'Arres: 26.523,91€.
- 069 03/03/2016 Devolucion ingrès indegut matricula ETEVA: 115,50€.
- 070 04/03/2016 Convocatòria session ordinària Conselh de Govèrn: dia 7 de març de 2016.
- 071 04/03/2016 Constituir er òrgan d'Experts dera licitacion des servicis d'"*Assessorament jurídic en matèria d'urbanisme*".
- 072 08/03/2016 Aprobacion ajuda activitats extraescolares (viatge escolar): Exp. 2012/00115: 130,00€.
- 073 08/03/2016 Autorizacion, disposicion, reconeixement d'obligacions e aprobacion dera relacion de factures corresponentes ara dusau quinzea deth mes de hereuèr de 2016: 194.958,74€.
- 074 08/03/2016 Autorizacion, disposicion, reconeixement dera obligacion e ordenacion pagament transferéncia correnta: organisme autonòm **SERVICI ARANÉS DE BENÈSTER E SALUT** [540.000,00 €].
- 075 08/03/2016 Ordenacion pagament relacion factures num. 08/03/16, per un impòrt totau de 890.065,76€.

- 076 08/03/2016 Autorizacion, disposicion, reconeishment dera obligacion e pagament retribucions ara Sra. Meritxell Ortí Jové deth mes de març de 2016 e finiquito deth sòn contracte, Adeslas, Seguretat Social e IRPF: 1.772,29€ + 46,21€ + 537,97€ + 362,54€
- 077 08/03/2016 Denegacion ajuda urgència social exp. 2014/00019.
- 078 11/03/2016 Aprobacion dera adjudicacion deth contracte menor d'òbra "*Mantieniment e rehabilitacion dera zòna exteriora e cubèrta dera Residència de Les*".
- 079 11/03/2016 1/Aprobacion ajuda urgència social: Exp. 2016/00022 per un impòrt de 318,87€.  
2/ Autorizacion, disposicion e pagament urgència social: 318,87€.
- 080 16/03/2016 Reconeishment de servicis en d'autres administracions a efèctes retributius: personau funcionari Sr. Pere Pascual Francés.
- 081 16/03/2016 Devolucion diuèrses garantides definitives:  
"*Transpòrt escolar rota Arres-Vilamòs-Pònt d'Arròs-Vielha*": 1.990,63€.  
"*Transpòrt escolar rota Casau-Vilac-Vielha*": 1.118,15€.  
"*Transpòrt escolar rota Arró-Arròs-Vila-Vielha*": 1.799,75€.
- 082 16/03/2016 Procediment d'atermenament de finca en Les.
- 083 17/03/2016 Autorizacion, disposicion, reconeishment d'obligacions e aprobacion de pagament relacion de pagament de caisha deth mes de gèr de 2016: 7,98€.
- 084 17/03/2016 Aprobacion ajuts teleassistència.
- 085 18/03/2016 Abilitacion deth Sr. Pere Pascual Francés, coma Secretari generau deth Conselh damb caractèr accidentau [21/03/2016 ath 11/04/2016] damb motiu des vacances deth titular.
- 086 18/03/2016 Convocatòria session ordinària Conselh de Govèrn: dia 22 de març de 2016.
- 087 18/03/2016 Autorizacion, disposicion, reconeishment d'obligacions e aprobacion dera relacion de factures corresponentes ara prumèra quinzea deth mes de març de 2016: 218.828,82€.
- 088 18/03/2016 Ordenacion deth pagament dera relacion de factures num. 18/03/16: 202.228,05€.

- 089 22/03/2016 Generacion de crèdits:  
[Agència Catalana de l'Aigua]: 58.502,03€.
- 090 29/03/2016 Autorizacion, disposicion, reconeishment d'obligacions e ordenacion de pagament de dus tiquets tà assistir ath sopar solidari deth Club Soroptimist dera Val d'Aran: 45,00€.
- 091 29/03/2016 Autorizacion, disposicion, reconeishment dera obligacion e pagament retribucions març 2016 personau Conselh, Adeslas, Seguretat Social, IRPF e MUFACE: 157.521,50€ + 3.696,80€ + 77.485,93€ + 31.055,39€ + 58,14€.
- 092 30/03/2016 Autorizacion, disposicion e pagament atencions assistenciaus ara 3au edat [març 2016]: 2.464,00€.
- 093 30/03/2016 Devolucion ingrés indegut matricula ETEVA: 45,00€ + 45,00€ + 200,00€.
- 094 30/03/2016 Designar advocats a efectes de representacion entà procediments judiciais.
- 095 30/03/2016 Autorizacion, disposicion, reconeishment d'obligacions e aprobacion relacion de pagament de taxes sanitàries des ramadèrs [març 2016]: 71,00€.
- 096 31/03/2016 1/Autorizacion pagament diètes, locomocion e desplaçaments març 2016 membres elèctes: 722,18€.  
2/Autorizacion pagament diètes, locomocion e desplaçaments març 2016 personau eventuu: 36,77€.  
3/Autorizacion pagament diètes, locomocion e desplaçaments març 2016 personau foncionari e laborau: 2.386,78€.
- 097 31/03/2016 Autorizacion, disposicion, reconeishment d'obligacions e pagament assisténcias: conselhèrs elèctes gèr –març 2016: [16.740,20 €].
- 098 31/03/2016 Autorizacion, disposicion, reconeishment d'obligacions e pagament indemnizacions grops politics 1 de gèr a 31 de març 2016: [3.969,42€ + 3.002,70€ + 1.069,29€].
- 099 01/04/2016 Autorizacion, disposicion e pagament ara Sra. Elisa Ros Barbosa e ara Sra. Mònica Rodríguez Sampederro des matricules deth cors organizat pera empresa “Veraicon”, en Barcelona: “*MuseumPlus – Nivèu basic*”, [20 e 21/04/2016]: 165,00€ + 165,00€.
- 100 01/04/2016 Convocatòria session ordinària Conselh de Govèrn: dia 4 d'abri

de 2016.

- 101 01/04/2016 1/Aprobacion ajuda urgència sociau: Exp. 2015/00173 per un impòrt de 400,00€.  
2/ Autorizacion, disposicion e pagament urgència sociau: 400,00€.
- 102 04/04/2016 Autorizacion, disposicion e pagament ajudes besonhs economics minjador [*hereuèr 2016*]: 155,10€.
- 103 07/04/2016 Autorizacion, disposicion, reconeishment dera obligacion e ordenacion deth pagament de liquidacion ara Diputació de Lleida (taxa BOP Confederación Hidrográfica del Ebro - Revision autorizacion abocament aigües residuaus:  
- Baguergue: 51,20€.  
- Les: 49,80€.  
- Canejan: 51,20€.
- 104 07/04/2016 Autorizacion, disposicion, reconeishment d'obligacions e aprobacion dera relacion de factures corresponentes ara dusau quinzea deth mes de març de 2016: 298.181,53€.
- 105 07/04/2016 Ordenacion deth pagament dera relacion de factures num. 07/04/16: 323.867,72€.
- 106 08/04/2016 Devolucion ingrès indegut matricula ETEVA: 130,00€.
- 107 08/04/2016 Nomentament urgent funcionària interina Sra. Mar Utrero Fernández tà corbir era vacanta per absència deth veterinari [11 ath 18/04/2016, 4ores diàries].
- 108 11/04/2016 Autorizacion, disposicion, reconeishment d'obligacions e ordenacion de pagament factura Registradora dera propietat: 6,37€.
- 109 11/04/2016 Autorizacion, disposicion, reconeishment d'obligacions e pagament transferéncia correnta: organisme autonòm SERVICI ARANÉS DE BENÈSTER E SALUT: 1.200.000,00€.
- 110 12/04/2016 Reconeishment d'obligacion e autorizacion deth pagament deth rèste deth convèni damb Baqueira Beret: 4.397,19€.
- 111 13/04/2016 Ordenar transferéncia extrapressupostària dera òbra includida en PUOSC:  
PG-MN 1106/2012 Ajuntament de Canejan: 3.828,66€ + 32.171,34€.  
PG 1107/2012 Ajuntament de Canejan: 67.832,08€ + 61.064,92€ +

13.000,00€.

- 112 13/04/2016 Contractacion laborau circumstàncies produccion: Sra. M. Carmen Solé Albacete coma *informadora toristicoculturau*, ena exposicion de Sant Joan d'Arties "Fotografia en relhèu" [15/04/2016-15/06/2016]
- 113 15/04/2016 Inici expedient: Delegacion ara Organisme Autònom de Recaptació de Tributs Locals (OAGRTL), dera competència entara requeptacion en via executiva des quantitats requeigudes en diuèrsi procediments administratius.
- 114 15/04/2016 Inici expedient: Modificacion deth Reglament regulador deth servici d'ajuda domiciliària deth Conselh Generau d'Aran.
- 115 15/04/2016 Inici expedient: Pròva pilòt entara milhora der accés motorizat ena Artiga de Lin
- 116 15/04/2016 Designar avocat a efectes de representacion entà procediments judiciais.
- 117 15/04/2016 Convocatòria session ordinària Conselh de Govèrn: dia 18 d'abriu de 2015.
- 118 18/04/2016 Convocatòria session ordinària Comission Informativa Permanenta de Servicis Generaus deth Conselh: dia 21 d'abriu de 2015.

Eth conselhèr Mgf. Sr. Francés X. Boya Alós pregunte com foncionarà eth servici corresponent ath nomentament deth comitè d'expèrts der assessorament juridic en matèria d'urbanisme, que se correspon damb eth Decret 071/2016.

Eth sindic li respon que se tracte d'un assessorament com eth que s'a hèt enquia ara ena modificacion deth Plan director. Ara se vò centrar ena modificacion des normes subsidiàries respècte de bòrdes e cabanes. Concludís qu'era importància deth servici merite ua licitacion a miei tèrme.

Eth conselhèr Mgf. Sr. Francés X. Boya Alós pregunte se i a destinat un impòrt entad aquesta licitacion.

Eth secretari generau, Sr. David Montalà i Palau, pren era paraula entà explicar qu'es plects tecnicos dera licitacion ac recuelhen, atau coma es dreus e obligacions der adjudicatari e es caracteristgiques tecnicas deth servici.

Era conselhèra Mgfca. Sra. Maria Vergés Pérez pregunte en qué consistís era modificacion deth servici d'assistència domiciliària previst en decret 114/2016.

Eth sindic li respon qu'eth pròpri servici a proposat era modificacion entà adaptar era normativa ara realitat d'aguest servici.

Eth Plen deth Conselh se'n da per assabentat.

3au.- APROBACION DEFINITIVA, SE PROCEDÍS, DER EXPEDIENT ENTARA MODIFICACION EN REGIM DE GESTION DETH SERVICI D'EMERGÉNCIES, PREVENCIÓN E ESCANDIMENT DE HUECS, RESCATS DE MONTANHA E PROTECCION CIVILA.-

Eth conselhèr Mgfc. Sr. Francés X. Boya Alós expòse qu'en darrèr plen eth sòn grop manifestèc era sua abstencion per ua qüestion de forma: considerauen que s'aurie auut de debàter e consensuar eth contiengut d'aguest punt. I auec ua amassada, era quau causa considèren insufisent. Afirme qu'eth tòc d'atencion non a auut efècte pr'amor que non s'a hèt cap d'amassada mè. Explique qu'an preguntat as pompièrs s'auien cap notícia mè. En conclusion, les semble qu'ath govèn li impòrte ben pòc era oposicion, que non les interèsse eth consens e açò ei motiu sufisent entà votar en contra.

Considèrè, per aute costat, qu'eth contiengut dera reforma ei limitat e insufisent pr'amor que non se tracte a hons era inclusion des pompièrs voluntaris ena estructura dera empresa. Istorically, es parcs de pompièrs se basen en voluntariat e era reforma non ac includís, coma minim en aquerò qu'ei escrit. Com non pòden saber qué mè i a mè enlà des papèrs, anóncie eth vòt en contra deth sòn grop, e mè quan se tracte d'un projècte que va mè enlà d'ua soleta legislatura e aurie de compdar damb un consens ampli en plen.

Eth conselhèr Mgfc. Sr. José Antonio Bruna Vilanova expause que mè enlà dera amassada ara quau s'a referit eth conselhèr Mgfc. Sr. Francés X. Boya Alós, i a ua junta generau de TESVA entà modificar es estatuts dera societat des que non s'a parlat ne i a auut cap d'amassada. Afirme que coma non se les a auut en compde, votarà en contra.

Eth sindic explique qu'ena amassada damb es redactors dejà se deishèc temps entà poder preguntar e parlar der abast dera modificacion. Indique que damb eth personau se mantiengueren enquia tres amassades, qu'acabèren damb era signatura d'un compromís.

Per çò que hè ath foncionament des pompièrs voluntaris, assegure que serà eth madeish pr'amor que s'a partit d'aguesta realitat, que se vò conservar e promòir. Era filosofia deth modèu non patís cambis sustanciaus e s'a mantiengut fidèlament ena reforma. Per tant, considèrè que fonamentar era oposicion ara prepausa ena minusvaloracion des pompièrs voluntaris non a honament, a despriet que respècte era libertat de vòt des grops.

Eth conselhèr Mgfc. Sr. Francés X. Boya Alós expòse qu'era EPE preveiguie ua taula de pompièrs voluntaris e eth cap de parc de Vielha formaue part deth conselh

de direccion dera entitat. Afirme qu'era redefinicion d'ua mercantila non s'adiu damb era realitat deth voluntariat e considèrè que non acabe d'encaishar. Mès enlà d'açò, eth sòn temor ges deth hèt qu'enes estatuts non se reflectís era incardinacion des pompièrs voluntaris ena naua estructura. Assegure que des papèrs non ges quin serà e les da motius entà votar en contra. Demane, fin finau, ath sindic que non tergivèrse eth sentit des sues paraules.

Eth sindic considèrè qu'es retribucions a temps parciau non se pòden aplicar pes limitacions que deriven dera LRSAL mès era prevision i è e se desvoloparà quan se pogue. Se remasse, per tant, aquerò que ja se preveiguie entara EPE.

Vist er acòrd deth Plen deth Conselh Generau d'Aran, adoptat en session ordinària de 22 de hereuèr de 2016, d'aprobacion iniciiau (1) dera *Memòria justificativa deth cambi de gestion des servicis publics d'emergéncias dera Val d'Aran a trauèrs d'ua societat mercantila locau de titularita publica: aspèctes juridics, sociaus, tecnicos e economics* e eth Projècte de modificacion deth servici d'emergéncias, prevencion e escandiment de huecs, rescats de montanha e proteccion civila mejançant gestion dirècta a trauèrs de societat mercantila damb capitau sociau intergrament publica, atau coma (2) dera forma de gestion dirècta a trauèrs de societat mercantila intergrament participada peth Conselh Generau d'Aran *Transpòrt e Emergèncias Sanitàries Val d'Aran SL*.

Vist qu'er nomenat acòrd se publicuèc en BOP de Lleida num. 38 de 25 de hereuèr de 2016, en pannèu d'anoncis e ena sedença electronica dera Corporacion e vist que passat eth tèrme de trenta (30) dies obrants d'exposicion publica (02/04/2016) non cònste coma presentada cap reclamacion ne alegacion en contra.

Dat qu'er art. 160.2 deth Decret 179/1995, de 13 de junh, peth quau s'apròve eth Reglament d'Òbres, Activitats e Servicis des Ens Locaus, establís qu'eth Plen dera Corporacion a d'aprovar definitivament (prealabla resolucion des alegacions formulades) er expedient entar establiment deth servici, eth projècte d'establiment e eth reglament que lo regularà, damb era prevision des efèctes economics qu'aguestes decisions compòrten.

Cossent damb çò expausat e visti es arts. 6, 246, 247, 249, 255 e 257 deth Decret legislatiu 2/2003, de 28 d'abriu, peth quau s'apròve eth Tèxte rehonut dera Lei Municipau e de Regim Locau de Catalunya, 160.2, 167.1.a) deth Decret 179/1995, de 13 de junh, peth quau s'apròve eth Reglament d'Òbres, Activitats e Servicis des Ens Locaus, 72 dera Lei 1/2005, de 5 de hereuèr, deth Regim Especial d'Aran, 9.1.j) e 9.1.k) dera Lei 19/2014, deth 29 de deseme, de Transparéncia, Accés ara Informacion Publica e Bon Govern, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era aprobacion definitiva deth cambi dera forma de gestion deth servici d'emergéncias, prevencion e escandiment de huecs, rescats de montanha e proteccion civila mejançant gestion dirècta a trauèrs de societat mercantila damb capitau sociau intergrament publica.

Un viatge sosmetuda era prepausa a votacion e debat, s'obtien **sèt (7) vòts a favor** deth sindic e des conselhèrs Mgf. Sr. Luis Carlos Medina Modroño, Mgf. Sr. César Ruiz-Canela Nieto, Mgf. Sr. Francesc Medan Juanmartí, Mgf. Sr. Jose Enrique Arró Cuny, Mgfca. Sra. Anna Diaz Morello e Mgf. Sr. José Antonio Boya Quintana, **e sies (6) vòts en contra** des conselhèrs Mgf. Sr. Francés X. Boya Alós, Mgf. Sr. Francisco Bruna Capel, Mgf. Sr. Amador Marques Atés, Mgfca. Sra. Maria Pérez Vergés, Mgf. Sr. Juan Antonio Serrano Iglesias e Mgf. Sr. José Antonio Bruna Vilanova pera quau causa s'acòrde per *majoria absoluta* des tretze (13) membres presents deth totau de tretze que formen era Corporacion:

Prumèr.- Aprovar definitivament era *Memòria justificativa deth cambi de gestion des servicis publics d'emergéncies dera Val d'Aran a trauèrs d'ua societat mercantila locau de titularita publica: aspèctes juridics, sociaus, tecnicos e economics*

Dusau.- Aprovar definitivament eth Projècte de modificacion deth servici d'emergéncies, prevencion e escandiment de huecs, rescats de montanha e proteccion civila mejançant gestion dirècta a trauèrs de societat mercantila damb capitau sociau intergrament publica.

Tresau.- Aprovar era forma de gestion dirècta des servicis publics d'emergéncies dera Val d'Aran a trauèrs de societat mercantila intergrament participada peth Conselh Generau d'Aran *Transpòrt e Emergéncies Sanitàries Val d'Aran SL*.

Aguesta gestion implicarà era modificacion des estatuts dera nomentada societat en, coma minim, es següenti aspèctes: (1) er objècte sociau, en tot includir-i era prestacion de toti es servicis d'emergéncies; (2) era denominacion sociau, entà qu'includisque toti es servicis d'emergéncies; (3) era normativa aplicable, qu'a d'èster actualizada; (4) eth caractèr de miei pròpri d'aguesta societat respècte deth Conselh Generau d'Aran, de forma qu'aguesti estatuts s'ajusten ad aquerò qu'establís er art. 72 dera Lei 1/2015, de 5 de hereuèr, deth Regim Especiau d'Aran, respècte des competéncies de gestion des servicis d'emergéncies per part deth Conselh Generau d'Aran.

Quatau.- Notificar aguesti acòrds ath Departament de Governació, Administracions Públiques i Habitatge dera Generalitat de Catalunya e ara Administración del Estado, damb liurament d'ua còpia dera Memòria justificativa e deth Projècte de modificacion deth servici.

Cincau.- Publicar era aprobacion definitiva d'aguest expedient mejançant anonci en BOP, en DOGC, en pannèu d'anoncis e ena sedença electronica dera Corporacion, damb expression des recorsí que se pòden interpausar, er organ e eth tèrme entara sua resolucion.

Se se vò impugnar era present resolucion, que met fin ara via administrativa, d'acòrd damb es articles 107.1, 116 i 117 dera Lei 30/92, de 26 de noveme, modificada per Lei 4/99, se pòt interpausar de forma potestatiua **recors potestatiu de reposicion** dauant eth mateix òrgan que l'a dictada, en tèrme d'un (1) mes a comptar deth dia següent ara sua notificacion o publicacion. Alternativament, d'acòrd damb er article 46 dera Lei 29/1998, de 13 de junhsèga, reguladora de la jurisdiccio contenciosa administrativa, procedís interpausar **recors contenciós administratiu** dauant deth Jutjat Contenciós Administratiu de Lleida, pendent eth terme de dus (2) mesi a comptar deth dia següent ara sua notificacion, sens perjudici que se pogue exercitar quausevolha auta accion o recors que s'estime procedent en defensa des vòsti drets.

En cas d'optar pera interposicio deth recors potestatiu de reposicion, calerà demorar ara sua resolucio entà poder interpausar recors contenciós administratiu.

Siesau.- Publicar aguesti acòrds en Portau dera Transparéncia dera Corporacion.

Setau.- Facultar ath sindic d'Aran, en nòm e representacion deth Conselh, entara signatura de toti es documents publics e/o privats que siguen de besonh tà her efectives era tramitacion e execucio des acòrds anteriors.

4au.- APROBACION, SE PROCEDÍS, DERA DELIMITACION E ATERMENAMENT DERA FINCA 1845 PROPRIETAT DETH CONSELH GENERAU D'ARAN SITUADA EN LES.-

Eth sindic explique era tramitacion administrativa der expedient.

Eth conselhèr Mgfc. Sr. Amador Marqués Atés anóncie que s'abstieràn pr'amor que les semble qu'i a bèth propietari que non i e d'acòrd e per aquerò eth sens deth sòn vòt.

Eth conselhèr Mgfc. Sr. José Antonio Bruna Vilanova anóncie era sua abstencion.

S'absten de participar en debat e votacion d'aguest punt dera orde deth dia eth conselhèr Mgfc. Sr. Francés X. Boya Alós,, pr'amor qu'en tot auer un vincle de parentiu per afinitat en primèr grad damb un des afectats en procediment, a era consideracion de part interessada sus aguest ahèr, cossent damb çò qu'establís er article 28.2.b) dera Lei 30/1992, de 26 de noveme, de Regim Juridic des Administracions Publiques e deth Procediment Administratiu Comun.

Vist qu'eth Plen deth Conselh Generau d'Aran, en session ordinària de 7 de seteme de 2015, aprovèc er inici d'ofici deth procediment d'atermenament dera finca registrau 1845 propietat deth Conselh Generau d'Aran plaçada en Les.

Dat qu'er acòrd anterior se notifiquèc ath Sr. Felipe Ané Brito e Sra. Manuela Ané Brito, Sr. Hipólito Cruces Socasau, ara Confederación Hidrográfica del Ebro e ath Ministerio de Fomento (registres de gessuda num. 1337 a 1340 de 15/09/2015), ena sua condicion de proprietaris des finques colindants damb era proprietat deth Conselh, e se les concedic un tèrme entà presentar es documents e allegacions qu'estimessen convenientes en pròva e defensa des sòns drets, sense que transcorrut eth tèrme autrejat agen presentat cap d'eri cap tipe de documentacion.

Vist que per Decret de Sindicatura num. 082/2016, de 17 de març de 2016, se resolèc dar per evacuat eth tramit de presentacion de documents e allegacions ath quau se referissen es art. 62 deth Reiau Decret 1372/1986 e 140 deth Decret 336/1988, en non auer estat presentada cap tipe de documentacion ne allegacion en tèrme autrejat ar efècte, e qu'ena madeisha resolucion se designèc ath Sr. Ignacio Landa Busquet coma tecnic damb titol facultatiu adequat entara realizacion des prètzhèts condusents ara determinacion des limits des proprietats afectades per atermenament dera finca registrau 1845 proprietat deth Conselh Generau d'Aran plaçada en Les, en tot citar-se personalament ad aqueth acte a toti es proprietaris de finques colindantes.

Dat qu'eth dia 13 d'abriu de 2016, tàs 10.35 ores, se procedic peth tecnic ara delimitacion e lheuament topografic dera linha divisòria dera nomentada finca, en tot finalizar era operacion sense que se produïssen manifestacions en contra relatives ara linha de colindància establida, segontes cònte en acta estenuda, qu'autorizen damb era sua signatura toti es presents.

Dat qu'en acta estenuda se descriu damb precision er emplaçament dera linha divisòria, era quau demore representada peth planol, a escala 1:500, qu'òbre en aguest expedient.

En tot èster competència deth Plen er exercici dera accion d'atermenament cossent damb er article 22.2 j) dera LBRL e 226 deth TRLMRLC.

Cossent damb çò expausat e visti es articles 226 deth Decret Legislatiu 2/2003, de 28 d'abriu, peth quau s'apròve eth Tèxte Rehonut dera Lei Municipau e de Regim Locau de Catalunya, 136 a 146 deth Decret 336/1988, de 17 d'octobre, peth quau s'apròve eth Reglament de Patrimòni des Ens Locaus, e 50 a 54 dera Lei 33/2003, de 3 de noveme, del Patrimòni des Administracions Publiques, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era aprobacion dera delimitacion dera finca registrau 1845 proprietat deth Conselh Generau d'Aran plaçada en municipi de Les.

Un viatge sosmetuda era prepausa a votacion e debat, s'obtien **sèt (7) vòts a favor** deth sindic e des conselhèrs Mgfc. Sr. Luis Carlos Medina Modroño, Mgfc. Sr. César Ruiz-Canela Nieto, Mgfc. Sr. Francesc Medan Juanmartí, Mgfc. Sr. Jose Enrique Arró Cuny, Mgfca. Sra. Anna Diaz Morello e Mgfc. Sr. José Antonio

Boya Quintana, e cinc (5) abstencions des conselhèrs Mgfç. Sr. Francisco Bruna Capel, Mgfç. Sr. Amador Marques Atés, Mgfca. Sra. Maria Pérez Vergés, Mgfç. Sr. Juan Antonio Serrano Iglesias e Mgfç. Sr. José Antonio Bruna Vilanova pera quau causa s'acòrde per *majoria absoluta* des dotze (12) membres presents deth totau de tretze que formen era Corporacion:

Prumèr.- Aprovar era delimitacion dera finca registrau 1845 propietat deth Conselh Generau d'Aran plaçada en municipi de Les, que limite:

- Ar oest, damb eth Sr. Hipólito Cruces Socasau, ena forma que s'a amiat a tèrme e segontes se detalhe en acta de delimitacion e en planol, a escala 1:500, qu'òbren en aguest expedient.
- Ath sud, damb eth Sr. Felipe Ané Brito e era Sra. Manuela Ané Brito, ena forma que s'a amiat a tèrme e segontes se detalhe en acta de delimitacion e en planol, a escala 1:500, qu'òbren en aguest expedient.
- Ath nòrd, damb era Carretèra Nacionau 230. Era delimitacion dera finca ei era que resulte der "*Expediente de expropiación forzosa para la urgente ocupación de las fincas afectadas por las obras del proyecto: MEJORA LOCAL. MEJORA DE LA TRAVESIA DE LES. CN-230 DE TORTOSA A FRANCIA POR EL VALLE DE ARAN.P.P.K.K 184+250. PROVINCIA DE LLEIDA*", qu'aurà d'èster modificada segontes er expedient incoat dauant deth Ministerio de Fomento entara reversion dera superfícia de 435 m<sup>2</sup> de terren per non èster de besonh entara execucion deth nomentat expedient.
- Ar est, damb er arriu Garona. Era delimitacion ei era que derive deth Reiau Decret Legislatiu 1/2001, de 20 de junhsèga, peth quau s'apròve eth Tèxte Rehonut dera Lei d'Aigües, per çò que hè ath domèni public idraulic e es corresponentes servituds legaus que si prevèn.

Dusau.- Notificar eth present acòrd ath Sr. Felipe Ané Brito e Sra. Manuela Ané Brito, Sr. Hipólito Cruces Socasau, ara Confederación Hidrográfica del Ebro e ath Ministerio de Fomento, propietaris des finques colindants damb era propietat deth Conselh Generau d'Aran, en tot adjúnher ua certificacion der acta de delimitacion amiada a tèrme e era planimetria corresponenta.

Tresau.- Procedir ara fitacion dera delimitacion, en tot comunicar era data d'aquesta actuacion a toti es interessats.

Quatau.- Rectificar er inventari entà recuélher era delimitacion practicada dera finca registrau 1845 propietat deth Conselh Generau d'Aran plaçada en municipi de Les

Cincau.- Comunicar eth present acòrd ath Registre dera Proprietat de Vielha, en tot adjúnher ua certificacion der acta de delimitacion amiada a tèrme e era planimetria corresponenta.

Siesau.- Facultar ath sindic d'Aran, en nòm e representacion deth Conselh, entara signatura de toti es documents publics e/o privats que siguen de besonh tà her efectives era tramitacion e execucion des acòrds anteriors.

**5au.- APROBACION, SE PROCEDÍS, DER INICI DETH EXPEDIENT DE DESAFECTACION DERA CASA FORESTAU DE BOSSÒST.-**

Eth sindic explique era realitat e es motius dera desafectacion. Manifèste que non i a cap finalitat posteriora, ne tanpòc cap de venda, e coma non a foncions administratives e ei barrat, per açò se plantège eth cambi.

Eth conselhèr Mgfc. Sr. Amador Marqués Atés i é d'acòrd damb eth cambi de natura, damb era voluntat que se conserve eth patrimonni public, e saiant de cercar ua finalitat e usatge publics ad aguesta bastissa.

Vist qu'eth Conselh Generau d'Aran ei propietari deth immòble plaçat en Passeg d'Eth Portilhon, 10, deth tèrme municipau de Bossòst, qualificat coma ben demaniau e qu'actualment se tròbe adscrit ara administracion forestau laguens deth Departament d'Agricultura, Ramaderia e Miei Naturau.

Dat qu'eth ben nomenat a esdeviengut non de besonh entà corbir era prestacion deth servici public ath quau ei adscrit, sense que servisque entà cap d'aute usatge o servici public dada era sua non adequacion entà èster un bastiment destinat a dependències publiques administratives, en tot èster en cambi susceptible de generar ingrèssi entara Isenda deth Conselh Generau d'Aran mejançant era sua venda coma ben patrimoniau.

Cossent damb çò que dispause er article 20 deth Decret 336/1988 de 17 de octubre, peth quau s'apròve eth Reglament de Patrimonni de Ens Locaus de Catalunya, entà alterar era qualificacion juridica des bens propietat dera administracion publica locau cau incoar un expedient, en que s'acredite era sua oportunitat e legalitat, a excepcion des supòsits previsti en article 24 deth madeish còs legau, que non ei eth cas, entara desafectacion coma ben demaniau deth nomenat ben, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era incoacion der expedient entara desafectacion coma ben demaniau der immòble plaçat en Passeg d'Eth Portilhon, 10, deth tèrme municipau de Bossòst.

Un viatge sotmetuda era prepausa a votacion e debat, s'obtien **tretze (13) vòts a favor** deth sindic e des conselhèrs Mgfc. Sr. Luis Carlos Medina Modroño, Mgfc. Sr. César Ruiz-Canela Nieto, Mgfc. Sr. Francesc Medan Juanmartí, Mgfc. Sr. Jose

Enrique Arró Cuny, Mgfca. Sra. Anna Diaz Morello, Mgfca. Sr. José Antonio Boya Quintana, Mgfca. Sr. Francés X. Boya Alós, Mgfca. Sr. Francisco Bruna Capel, Mgfca. Sr. Amador Marques Atés, Mgfca. Sra. Maria Pérez Vergés, Mgfca. Sr. Juan Antonio Serrano Iglesias e Mgfca. Sr. José Antonio Bruna Vilanova pera quau causa s'acòrde per *unanimitat* des tretze (13) membres presents deth totau de tretze que formen era Corporacion:

Prumèr.- Incoar er expedient entara desafectacion coma ben demaniau, actualment adscrit ara administracion forestau laguens deth Departament de Agricultura, Ramaderia e Medi Naturau deth Conselh Generau d'Aran, der immòble plaçat en Passeg d'Eth Portilhon, 10, deth tèrme municipau de Bossòst, que cònste numerat en inventari de bens propietat deth Conselh Generau d'Aran ena ficha numerò 41.

Dusau.- Dispausar qu'eth Conselhèr d'Agricultura, Ramaderia e Miei Naturau deth Conselh Generau d'Aran emete informe sus era oportunitat d'aguesta desafectacion e qu'era Secretaria generau emete informe sus era legalitat e procediment aplicable ara desafectacion deth ben referenciat, damb caractèr prealable a sotmèter er expedient a informacion publica, cossent damb çò que dispòse er article 20.2 deth Decret 336/1988 de 17 de octubre, peth quau s'apròve eth Reglament de Patrimòni de Ens Locaus de Catalunya.

Tresau.- Facultar ath Sindic d'Aran, en nòm e representacion deth Conselh, entara signatura de toti es documents publics e/o privats que siguen de besonh tà her efectives era tramitacion e execucion des acòrds anteriors.

6au.- APROBACION, SE PROCEDÍS, DERA DELEGACION ARA DIPUTACION DE LLEIDA DES FACULTATS QU'AGUEST CONSELH A ATRIBUSIDES EN MATÈRIA DE REQUEPTACION EN VIA EXECUTIVA DE DETERMINATS INGRÈSSI DE DRET PUBLIC.-

Eth sindic explique es antecedents e eth contingut dera delegacion.

Eth conselhèr Mgfca. Sr. Francés X. Boya Alós manifèste qu'i son d'acòrd e cre que se tracte d'ua decision encertada.

Eth vigent Reiau Decret Legislatiu 2/2004, de 5 de març, peth quau s'apròve eth text rehonut dera Lei Reguladora d'Isendes Locaus, atribusís as entitats locaus es facultats de requeptacion voluntària e executiva des sòns tributs e d'auti ingrèssi de dret públic.

Era complexitat qu'era realizacion d'aguestes foncions supause e atau madeish era sua importància laguens deth mès ampli ambit dera Isenda Locau, aconselhe era utilizacion de formules que permeten un eficaç exercici des facultats nomentades, laguens des sistèmes qu'entad aguesta finalitat prevè era normativa locau aplicabla.

Dat qu'era delegacion dera requeptacion executiva des impòrts des procediments administratius en ambit dera competéncia deth Conselh Generau d'Aran ar OAGRTL a de perméter incrementar es ingrèssi per aguesti concèptes en tot reduir eth numerò de drets pendants de crobament d'aguesti impòrts.

Dat qu'er OAGRTL poirà desvolupar aguesta requeptacion executiva des quantitats requeigudes en dièrsi procediments administratius en ambit dera competéncia deth Conselh Generau d'Aran de forma mès eficaç e eficienta qu'eth Conselh Generau d'Aran pr'amor que dispause des mieis tecnicos e umans.

Cossent damb çò que dispausen es articles 7 deth Reiau Decret Legislatiu 2/2004, de 5 de març, peth quau s'apròve eth Tèxte rehonut dera Lei Reguladora des Isendes Locaus, 106.3 dera Lei 7/1985, de 2 d'abriu, Reguladora des Bases de Regim Locau, 9.1 deth Decret legislatiu 2/2003, de 28 d'abriu, peth quau s'apròve eth Tèxte rehonut dera Lei Municipau e de Regim Locau de Catalunya e 13 dera Lei 30/1992, de Regim Juridic des Administracions Publiques e deth Procediment Administratiu Comun, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era aprobacion dera delegacion Diputació de Lleida des facultats qu'eth Conselh Generau d'Aran a atribuïdes en matèria de requeptacion de dièrsi ingrèssi de Dret Public.

Un viatge sotmetuda era prepausa a votacion e debat, s'obtien **tretze (13) vòts a favor** deth sindic e des conselhèrs Mgf. Sr. Luis Carlos Medina Modroño, Mgf. Sr. César Ruiz-Canela Nieto, Mgf. Sr. Francesc Medan Juanmartí, Mgf. Sr. Jose Enrique Arró Cuny, Mgfca. Sra. Anna Diaz Morello, Mgf. Sr. José Antonio Boya Quintana, Mgf. Sr. Francés X. Boya Alós, Mgf. Sr. Francisco Bruna Capel, Mgf. Sr. Amador Marques Atés, Mgfca. Sra. Maria Pérez Vergés, Mgf. Sr. Juan Antonio Serrano Iglesias e Mgf. Sr. José Antonio Bruna Vilanova pera quau causa s'acòrde per *unanimitat* des tretze (13) membres presents deth totau de tretze que formen era Corporacion:

Prumèr.- Delegar ara Diputació de Lleida, a trauès deth sòn Organisme Autònom de Recaptació de Tributs Locals (OAGRTL) o forma de gestion de servici que s'acòrde, es facultats qu'eth Conselh Generau d'Aran, ara empara d'aquerò establhit en article 106.3 dera Lei 7/1985, de 2 d'abriu, Reguladora des Bases de Regim Locau e er article 7 deth Reiau decret legislatiu 2/2004, de 5 de març, peth quau s'apròve eth Tèxte rehonut dera Lei Reguladora des Isendes Locaus, a atribuïdes en matèria de requeptacion des ingrèssi de Dret Public que s'especificuen ara seguida, damb er abast, eth contiengut, es condicions e era vigéncia que s'establissen en present acòrd:

- Reintegrament de subvencions autrejades per aguest Conselh.
- Devolucion d'ingrèssi públics indeguts.

- Taxa entà autorizacions, anotacions o registres administratius e pes activitats de contròtle sanitari, en matèria de proteccion dera salut, efectuat sus industries, establiments, servicis, laboratòris, productes e d'aites activitats relacionades.
- Taxa entà es servicis de tramitacion d'autorizacions administratives e de comprobacions tecnica sanitària en matèria de policia sanitària mortuòria.
- Taxa d'inspeccions e contròtle sanitari d'animaus e es sòns productes.
- Taxa entà autes actuacions sanitàries.

Dusau.- Eth contiengut e abast dera delegacion ei çò que seguís:

- 1) Es facultats de requeptacion, en període executiu, autant de deutes per rebut o per liquidacion d'ingrés dirècte e, se de cas, autoliquidacions, corresponentes as Tributs e/o Prètzis Publics que se nomenen en acòrd prumèr, que comprèn guaires actuacions conteng era gestion requeptatòria cossent damb era legislacion aplicabla e, se de cas, es següentes:
  - a) Practicar notificacions collectives en deutes per rebut o crobament collectiu e es notificacions individuaus en liquidacions per ingrès dirècte.
  - b) Liquidar interèssi de demora en toti es deutes que siguen exigibles.
  - c) Concedir o denegar ajornaments e fraccionaments de pagament en volentària e executiva.
  - d) Recéber e custodiar es garanties des deutes o dispensar-les.
  - e) Ordenar era constitucion d'hipotèques especiaus.
  - f) Dictar acòrds de derivacion de responsabilitat en procediment de requeptacion.
  - g) Declarar er embargament de bens e eth sòn lheuament, se procedís, atau coma totes es actuacions condusentes ad aquest hèt.
  - h) Era declaracion de deutor fallit, de credits incrobables, de prescripcion de deutes, de valor defectuós e de quinsevolh aute motiu de data de valors.
  - i) Amiar a tèrme peritatges e avaloracions de bens embargats.
  - j) Autorizar e presidir es subhastes.
  - k) Acordar era suspension deth procediment.
  - l) Entaular terceries de domèni e de mielhor dret.
  - m) Prepausar era adjudicacion de finques ath Conselh Generau d'Aran, liurant es certificacions de besonh entara sua inscripcion enes Registres Publics.
  - n) Era resolucion de recorsi contra es actuacions deth procediment de requeptacion dictades per un organ dera Diputació de Lleida.

Tresau.- Dat qu'eth Conselh Generau d'Aran sonque delègue era requeptacion en període executiu, demore obligat a salvar era tramitacion legaument establida de gestion tributària e de requeptacion en volentària, entre es quaus se pòden detalhar es següentes:

- a) Aprobacion des liquidacions tributàries, autat se son de crobament periòdic o d'ingrés dirècte.
- b) Aprobacion deth calendari de crobament.
- c) Notificacion collectiva deth padron en cas de crobament periòdic o notificacion individuau en cas de liquidacions d'ingrés dirècte.
- d) Resolucion des expedients de devolucion d'ingrèssi indeguts.
- e) Liurar era relacion certificada de deutors de cada periòde de crobament.
- f) Dictar era providéncia de constrenhiment.
- g) Confeccionar eth plec de cargues.

Quatau.- Es condicions dera delegacion son es que seguissen:

- 1) Eth Conselh Generau d'Aran s'obligue a utilizar coma unic organ de requeptacion en volentària e en executiva, a compdar dera data de delegacion, era Diputació de Lleida pes concèptes a requeptar objècte d'aguest acòrd de delegacion.
- 2) Entar exercici des facultats delegades, era Diputació de Lleida s'atierà ar Ordenament Locau e ara legislacion aplicabla cossent damb aquerò establhit en Reiau Decret Legislatiu 2/2004, de 5 de març, peth quau s'apròve eth Tèxte rehonut dera Lei Reguladora des Isendes Locaus, atau com ena normativa qu'en matèria de gestion e requeptacion tributàries pogue dicatar era Diputació de Lleida en us dera sua potestat reglamentària prevista en article 106.2 dera Lei 7/1985, de 2 d'abriu, Reguladora des Bases de Regim Locau.
- 3) Entar exercici des foncions encomanades en present acòrd, era Diputació de Lleida perceberà era vigenta taxa peth servici de requeptacion en via executiva, prevista en article 6au Epígrat 4 dera vigent Ordenança Fiscau num. 4 dera Diputació de Lleida (**BOP num. 15, de 23 de gèr de 2015**) enes següents tèrmes:
  - 7,5% dera quòta sus eth principau, s'eth recargue ei deth 5 o deth 10%.
  - 15% dera quòta sus eth principau, s'eth recargue de constrenhiment ei deth 20%.
  - 100% des interèssi en favor deth Conselh Generau d'Aran.
  - 100% deth recargue de quinsevolh tipe (5, 10 o 20%) en favor deth Conselh Generau d'Aran.

**Tarifa 4au: Taxa entara gestion des expedients des quaus s'a delegat unicament era via executiva de constreta.**

Grops	Tipe %
1. Ens locaux que sonque deleguen era requeptacion en via executiva de taxes, impòsti, prètz publici e ingrèssi de dret public, e que non an delegada en volentària cap des taxes der article 20 deth TRLRHL.	3,5 %
2. Ens locaux que, en via volentària an delegades taxes que non son es des apartats r), s), e t)	2,5 %

de l'article 20.4 deth TRLRHL (clavagueram, lordères e aigua) e que deleguen en executiva era requeptacion de quinsevolha taxa, impòsti, prètzi publics e ingrèssi de dret public

3. Ens locaus qu'en via volentària an delegades quinsevolha des taxes des apartats r), s) e t) der article 20.4 de TRLRHL (clavagueram, lordères e aigua) e que deleguen en executiva era requeptacion de quinsevolhataxa, impòsti, prètzi public e ingrèssi de drets publics. 2%

Es quantitats a què donguen lòc aquestes compensacions economicas seràn retengudes pera Diputació de Lleida des liquidacions corresponentes que se realizen ath Conselh Generau d'Aran.

- 4) Era devolucion per ingrèssi indeguts la realitzarà eth pròpri Conselh Generau d'Aran.
- 5) En mes de hereuèr se liquidarà era requeptacion executiva obtinguda en exercici anterior, dedusint era compensacion economica der apartat 3). Enes mesi d'abriu, junhsèga e octubre se realitzarà un liurament a compde corresponent ath 85% dera requeptacion en procediment executiu deth trimesadèr anterior.
- 6) Era Diputació de Lleida pendent eth mes de març de cada exercici facilitarà ath Conselh Generau d'Aran eth compde de requeptacion, integrat pera documentacion següenta:
- Resum dera gestion de crobament en volentària e en executiva per recebuts e liquidacions d'ingrés dirècte.
  - Resum per exercicis e concèptes des motius de cargue, ingrèss, dates e pendent de crobament.
  - Prealabla peticion deth Conselh Generau d'Aran, relacion individualizada de quinsevolh motiu de cargue, de data o de pendent.

Atau madeish, trimesaderament, se facilitarà ath Conselh Generau d'Aran era lista individualizada de totes es dates que s'agen produxit en darrèr trimesadèr, especificada, per motiu de data, entà qu'eth Conselh Generau d'Aran n'age coneishement e pogue sollicitar es aclariments o objeccions que creigue oportuns.

- 7) Cossent damb eth punt 2 der article 173 deth Reiau Decret Legislatiu 2/2004, de 5 de març, peth quau s'apròve eth Tèxte rehonut dera Lei Reguladora des Isendes Locaus, era Diputació de Lleida demore relheudad dera prestacion de fidances entà respòner dera gestion requeptatòria, sens perjudici des garanties qu'eth nomentat Ens Provinciau pogue exercir as requeptadors o a d'autres agents qu'intervenguen ena gestion deth servici.
- 8) Per cada concèpte qu'age era consideracion d'ingrés de Dret Public e que sigue objècte deth present acòrd de delegacion, eth Conselh Generau d'Aran aurà de remétre ara Diputació de Lleida era documentacion que seguís:

- a) Providència de constrenhiment.
- b) Plec de cargues damb expression deth periòde, concèptes e quantitats parciaus e totaus.
- c) Cinta magnetica o disquet, comprensiu deth crobament a realizar, cossent damb eth dessenh deth Departament d'Informàtica dera Diputació de Lleida.
- d) Certificat dera aprobacion deth padron fiscau e deth resultat dera exposicion ath public deth padron, atau coma fotocòpia der anonci en Butlletí Oficial de la Província de Lleida.
- e) Certificat des tramits dera imposicion e ordenacion des tributs d'acòrd damb era legislacion vigenta, atau coma fotocòpia dera publicacion dera Ordenança en Butlletí Oficial de la Província de Lleida.
- f) Fotocòpia deth BOP on gesque publicat eth calendari de crobament, en cas de rebut de crobament periòdi, o fotocòpia dera notificacion dera liquidacion, en cas de liquidacion d'ingrés dirècte.
- g) Fotocòpia intègra der expedient en deutes derivadi de contribucions especiaus, execucions subsidiàries e d'outes supòsits.

Cincau.- Un còp acceptada pera Diputació de Lleida, era present delegacion entrarà en vigor a compdar deth dia següent ara publicacion der acòrd d'acceptacion dera delegacion en *Butlletí Oficial de la Província de Lleida*, en tot demorar tacitament prorrogada, per periòdes de cinc (5) ans, en cas que cap des parts manifeste expressament era sua volentat en contra, en tot comunica'c ar auta damb ua auança non-inferiora as sies mesi dera sua finalizacion o ara de quinsevolh des periòdes de prorròga.

Siesau.- Eth present acòrd d'aurà de notificar ara Diputació de Lleida as efèctes que pera sua part se procedisque ara acceptacion dera delegacion atreujada.

Setau.- Un còp acceptada era delegacion pera Diputació de Lleida, eth present acòrd se publicarà en *Butlletí Oficial de la Província de Lleida* e en *Diari Oficial de la Generalitat de Catalunya*, entath coneishement generau, cossent damb çò que prevé er article 7.2 deth Reiau Decret Legislatiu 2/2004, de 5 de març, peth quau s'apròve eth Tèxte Rehonut dera Lei Reguladora des Isendes Locaus.

Ueitau.- Facultar ath sindic, en nòm e representacion deth Conselh, entara signatura de toti es documents publics e/o privats que siguen de besonh entà her efectives era tramitacion e execucion d'aguesti acòrds.

**7au.**- APROBACION INICIAU, SE PROCEDÍS, DERA PRÒVA PILÒT ENTARA REGULACION DER ACCÉS MOTORIZAT ARA RIBÈRA DETH JOEU.-

**Eth sindic explique es antecedents d'aguest expedient. Informe que se bastic eth centre d'interpretacion dera Artiga de Lin en plan dera ermita. Quan s'aprovèc eth**

plan especiau d'aguest parçan, se preveigueren un seguit de mesures, entre es quaus i figuraue era regulacion der accès. Indique qu'era base dera pròva pilòt son ues enquestes de hè uns ans on se remassauen es epòques e ores de maxima affluència. Parallelament, s'a cercat ua formula diferenta entà transitar es darreris tres quilomètres, mejançant un trenet, entà non centrar-se en classic des taxis e darle atau ua singularitat. Dera avaloracion hèta, ne gesserà era propòsta d'ua regulacion de caractèr mès permanent. Per tant, dempús der ostiu se n'analitzarà eth futur.

Eth conselhèr Mgfc. Sr. Francés X. Boya Alós vò hèr ua consideracion: era propòsta la trape ben, mès era montanha ei de dus municipis e, per tant, aurie de compdar damb eth sòn consentiment. Les cònte que i a auut dues amassades, des quaus ne gessec eth compromís de presentar un projècte que non an rebut encara. Se tracte d'ua ribèra fòrça importanta pr'amor qu'i a d'autres actuacions que se i poderien hèr, mès enlà dera regulacion deth transit.

Non li cònte qu'es ajuntaments i poguen estar en contra, mès cre que sentarie un mau precedent aprovar aguest projècte sense er acòrd prealable des proprietaris dera montanha.

Eth sindic explique que se hèren dues amassades damb es Ajuntaments de Vielha e Mijaran e d'Es Bòrdes e damb es EMD d'Aubèrt e Vilac enes quaus se parlèc des linhas mèstres dera pròva pilòt. Indique qu'i auie un compromís de hèr er esfòrc economic entà sostier era pròva pilòt e es sues caracteristiques, que non hermetizen er accès ara ribèra; a mès des explicacions hètes enes dues amassades, se considerèc que non calien mès amassades. Se cau anar per aguesta via, considèrè que calerie entrar a revisar es convènis damb es ajuntaments sus era gestion de camins.

Informe que se compdaue damb eth consentiment de dues des tres entitats presentes, non s'afècte as vesins e tanpòc afècte ath sector deth taxi e per aquerò cre que non calie moltes explicacions entà sotmèter ath plen ua pròva pilòt de dus mesi. Afirme que cau dimensionar es plantejaments dera oposicion ara magnitud dera mesura que se sotmet ara consideracion deth Plen. A mès, non se hè arren que non se hèsque en d'autres destins e qu'aquiu se hèren damb finalitats merament requetatóries. Se tracte, en definitiva, de mèter en valor er entorn.

Eth conselhèr Mgfc. Sr. Francés X. Boya Alós repetís qu'eth sòn grop non ei en contra dera mesura, mès les sòbte qu'avorrisque tant ath govèrn parlar des causes e enviar ar Ajuntament de Vielha e Mijaran, qu'ath dessus a cambiat de color politic, un escrit en quau s'expliquesse era mesura, coma titular dera montanha. Se queishe dera manca de gesti de bona voluntat e de respècte ara rèsta d'institucions araneses. En aguest sens, garantís era unanimitat se minimament s'apliquesse un critèri de cercar consensi, era quau causa non a passat.

Eth sindic li demane ath conselhèr Mgfc. Sr. Francés X. Boya Alós qu'ara non magnifique aguest ahèr pr'amor qu'era actitud de normalitat deth Conselh Generau d'Aran aurie d'èster era madeisha qu'auesse aplicat er Ajuntament de Vielha e

Mijaran en aguest ahèr, vista era dimension dera mesura, qu'ei ua pròva pilòt de dus mesi. Des resultats ne gesserà era basa sufisenta enta crear un dossier complèt entàs proprietari e veir qué cau entath futur. Assegure qu'era regulacion finau se debaterà damb es Ajuntaments.

Eth conselhèr Mgfc. Sr. Juan-Antonio Serrano Iglesias expòse qu'enes dues amassades se quedèc que se'n parlarie mès. Indique qu'eth projècte non calie que sigesse de vint huelhes e dilhèu damb ua soleta huelha n'i auesse auut prou. Se ratifique en que se quedèc que se'n parlarie mès abans de porta'c tath plen e que se les enviesse un projècte prealablement.

Eth conselhèr Mgfc. Sr. Luis Carlos Medina Modroño se vò centrar en objècte der acòrd, qu'ei ua mesura entà redusir e liberar era circolacion de veïculs a motor pera ribèra deth Joèu e que considèrè qu'ei prou encertada.

Eth conselhèr Mgfc. Sr. Francés X. Boya Alós li replique qu'ua causa non tre era auta.

Eth sindic afirme qu'er objècte dera mesura ei dar un sens as previsions deth Plan especiau e que, damb es explicacion dades, totes es parts exceptat de Vielha e Mijaran i an estat d'acòrd e per aquerò retrè que se soberdimensione era discussion.

Eth conselhèr Mgfc. Sr. Francés X. Boya Alós assegure qu'era actitud deth sindic damb es ajuntaments non ei pas bona ne era adequada. Arres non li nègue que s'age de regular er accès ara ribèra deth Joèu, senon que s'aurie de hèr ua regulacion integrala mès enlà d'aguesta mesura concreta. Non se qüestione era mesura, senon es formes. Cre, donques, que s'an de bastir consensi.

Eth sindic li replique que non i a discussion se un non la genèrè.

Eth conselhèr Mgfc. Sr. Francés X. Boya Alós respon que non ei açò, senon que cau tractar de cercar consensi e respectar es competències de toti es afectadi e non pas imposar eth "rodillo".

Eth conselhèr Mgfc. Sr. Juan-Antonio Serrano Iglesias critique que non se pòt actuar en casa d'auti sense compdar damb eth sòn consentiment.

Eth sindic argumente que se eth convèni damb es ajuntaments prevè qu'er usatge e gestion des pistes se traspasse ath Conselh Generau d'Aran, cau exercir aquerò previst en convèni. Se cau replantejar-se aqueth acòrd, dilhèu tanben cau revisar eth convèni de gestion.

Se daurís ua agra discossion entre eth sindic e es conselhèrs Mgfc. Sr. Francés X. Boya Alós e Mgfc. Sr. Juan-Antonio Serrano Iglesias respècte dera sufisència des amassades amiables a tèrme e eth caractèr deth posicionament de cadua des parts.

Eth conselhèr Mgf. Sr. Juan-Antonio Serrano Iglesias **condicione era abstencion a que se hèsque ua amassada damb er Ajuntament de Vielha e Mijaran entà parlar d'aguest ahèr e cercar punts en comun ena pròva pilòt.**

Eth sindic se i compromet, en tot proposar que se hèsque aguesta madeisha setmana se era agenda ac permet.

Dat que es arts. 61.1 e 62.4.e) dera Lei 1/2015, de 5 de hereuèr, deth Regim Especiau d'Aran, autregen competéncia ath Conselh Generau d'Aran entà preservar era natura e amiar a tèrme es regulacions en accés motorizat que s'estimen de besonh laguens d'Aran.

Cossent damb es dèuers de preservar eth miei ambient, d'articular mesures coercitives der impacte ambientau, de hèr efectives es condicions entara preservacion dera natura e establir es condicions que permeten a totes es persones eth gaudi deth patrimòni naturau e païsatgistic, de facilitar as ciutadans era informacion mieiantamb, de fomentar era educacion enes valors dera preservacion e dera melhora deth miei ambient coma patrimòni comun, que mèrque er art. 21 dera Lei 1/2015, de 5 de hereuèr, deth Regim Especiau d'Aran, coma principis rectoris d'Aran.

Vist eth besonh de preservar eth miei ambient e méter en valor es recorsi naturaus dera Val entà mantier era consideracion que a de besonh un territòri damb un naut valor ecologic e paisatgistic, en consonància damb era sua declaracion coma Biosphere destination.

Vista era Ordenança reguladora der accés motorizat ath miei naturau en territòri dera Val d'Aran [BOP de Lleida num. 12, de 27 de gèr de 2001], qu'establís ua regulacion basica sus aguest ahèr e era quau compde damb un annèxe que regule ua situacion fòrça similara enes Ribères de Valarties e Aiguamòg.

Vist eth Plan especiau urbanistic d'equipaments ena Artiga de Lin e entorns, aprovat definitivaments eth 23 de gèr de 2014, que recuelh un seguit de mesures urbanistiques en consonància damb aguesta volentat de preservar aguest espaci naturau, çò qu'implique eth besonh d'establir ua regulacion der accés ath miei naturau ena Ribèra deth Joèu.

Vista era volentat de compatibilizar er establiment dera naua regulacion damb eth besonh d'analizar-ne era repercussion, en tot sajar de cercar era solucion mès adequada ara realitat concrèta d'aqueth espaci, per çò que se considèrè avient d'establir ua pròva pilòt de durada temporau e, ara vista des sòns resultats, aprovar posteriorament ua normativa de caractèr permanent.

Cossent damb çò expausat e çò previst enes articles 178 e següents deth Decret Legislatiu 2/2003, de 28 d'abriu, peth quau s'apròve eth Tèxte Rehonut dera Lei

Municipau e de Regim Locau de Catalunya, 60 e següents deth Decret 179/1995, de 13 de junh, peth quau s'apròve eth Reglament d'Òbres, Activitats e Servicis des Ens Locaus, 10.1.a) e 10.1.c) dera Lei 19/2014, deth 29 de deseme, de Transparéncia, Accés ara Informacion Publica e Bon Govern, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era aprobacion iniciau der establiment d'ua pròva pilòt entara milhora der accés motorizat ena Artiga de Lin.

Un viatge sosmetuda era prepausa a votacion e debat, s'obtien **sèt (7) vòts a favor** deth sindic e des conselhèrs Mgfç. Sr. Luis Carlos Medina Modroño, Mgfç. Sr. César Ruiz-Canela Nieto, Mgfç. Sr. Francesc Medan Juanmartí, Mgfç. Sr. Jose Enrique Arró Cuny, Mgfca. Sra. Anna Diaz Morello e Mgfç. Sr. José Antonio Boya Quintana, e **sies (6) abstencions** des conselhèrs Mgfç. Sr. Francés X. Boya Alós, Mgfç. Sr. Francisco Bruna Capel, Mgfç. Sr. Amador Marques Atés, Mgfca. Sra. Maria Pérez Vergés, Mgfç. Sr. Juan Antonio Serrano Iglesias e Mgfç. Sr. José Antonio Bruna Vilanova pera quau causa s'acòrde per *majoria absoluta* des tretze (13) membres presents deth totau de tretze que formen era Corporacion:

Prumèr.- Aprovar iniciauments er establiment d'ua pròva pilòt entara milhora der accés motorizat ena Artiga de Lin, que se regirà pes articles que seguïssen:

**“REGULACION PILÒT ACCÉS MOTORIZAT ARA RIBÈRA DETH  
JOÈU ENA SASON D'OSTIU**

*Article 1. Competéncia*

*Era regulacion especifica der accés motorizat ena Ribèra deth Joèu a era sua justificacion e basa legau enes arts. 21 e 62.4.e) dera Lei 1/2015, de 5 de hereuèr, deth Regim Especial d'Aran, e en art. 7 dera Ordenança reguladora der accés motorizat ath miei naturau en territòri dera Val d'Aran, publicada en Butletí Oficial de la Província de Lleida num. 12, de dia 27 de gèr de 2001.*

*Article 2. Objècte*

*Er objècte d'aguesta regulacion ei establir limitacions especificas entà accedir ara Ribèra deth Joèu, ena sason d'ostiu, en relacion damb es caracteristiques des veïculs que volguen circular-i, mielhorar era proteccion deth miei ambient e dinamizar era activitat toristica der airau.*

*Article 3. Ambit territorial d'aplicacion: zòna objècte de regulacion*

*Era via ena que se regule er accés ei:  
era pista forestau que gès deth nuclèu d'Es Bòrdes e arribe enquia eth Plan dera Artiga de Lin, atau coma es que li accedissen.*

*Eth tram en que se regule ei:*

*Des dera Ermita dera Mair de Diu dera Artiga (ara nautada dera zòna d'estada obligatòria entà veïculs) enquiath final dera pista.*

*Article 4. Vigéncia dera limitacion*

*S'establís un període de limitacions especificques ena liura circulacion de veïculs en tram nomenat en article anterior que va des deth dia 22 de junhsèga ath dia 11 de seteme der an 2016.*

*Era rèsta der an, e per tot çò non previst en aguesta regulacion, er accés motorizat ad aquestes zònes s'adequarà as previsions dera Ordenança generau reguladora e dera rèsta der ordenament vigent.*

*Article 5. Veïculs afectadi*

*1) Veïculs autorizadi:*

- *Aqueri qu'abonen er Impòst de Circulacion (IVTM) en bèth des ajuntaments dera Val d'Aran.*
- *Eth veïcül o veïculs deth servici de transpòrt alternatiu qu'establisque eth Conselh Generau d'Aran.*
- *Es veïculs particulars des proprietaris des finques plaçades ena zòna d'accés restringit.*
- *Excepcionaments, es veïculs particulars des persones qu'an o realizen bèra activitat empresariau, culturau o scientifica, autorizada per organisme competent laguens dera zòna d'accés restringit, e sonque pendent eth temps de besonh entà realizar era activitat en concrèt.*

*2) Identificacion de veïculs autorizadi*

*Es veïculs autorizadi auràn de dispausar deth distintiu que les identifique coma autorizadi, distintiu que s'a de sollicitar e posteriorament serà liurat annaments pes ajuntaments dera Val d'Aran.*

*3) Requisites entà sollicitar es distintius*

*Entà sollicitar eth distintiu de "Veïcül Autorizat", cau amassar bèra des condicions recuelhudes en apartat prumèr d'aguest article. En tot cas calerà comprovar prealablement, per miei dera documentacion que sigue de besonh, qu'era persona beneficiària non a cap de deute pendent de pagament damb eth Conselh Generau d'Aran, es sòns organismes autonòms e es sues societats mercantiles, atau coma damb quinsevolh des ajuntaments dera Val d'Aran, autat per motiu de recorsi pròpris coma per motiu de recorsi administradi per d'outes entitats. En cas d'existir deutes pendents, se procedirà ara sua retencion.*

*Article 6. Normes de circulacion especificques laguens dera Ribèra deth Joeu*

*Es normes de circulacion especificques son es següentes:*

- 1. Enquiara zòna d'estada obligatòria entà veïculs: circulacion damb quinsevolh equip.*
- 2. A compdar dera zòna d'estada obligatòria entà veïculs: circulacion sonque damb veïcül autorizat, damb eth corresponent distintiu.*
  - *Zòna d'estada obligatòria entà veïculs:  
Parcatge dera Ermita dera Mare de Diu d'Artiga de Lin.*
  - *Zònes d'informacion:  
Ena zòna d'estada obligatòria entà veïculs s'abilitarà ua caseta d'informacion, qu'atierà es dubtes e preguntes des usatgèrs en orari que s'establisque enes panèus indicatius.*
- 3. En cas d'abséncia deth personau dera caseta o de qu'aguesta sigue barrada, non s'eximirà as usatgèrs deth compliment d'aguesta normativa ath long des 24 ores.*

4. Eth servici de transpòrt alternatiu consistirà en un trenet d'usatge public, damb orari de 9 a 18 ores e damb es prèzi que còsten ena taula ath dejós. Pendent es ores que non se dongue eth servici regirà era limitacion des apartats 1 e 2.

	Un viatge	Anada e tornada
0 a 3 ans	0 €	0 €
3 a 12 ans	1 €	2 €
mès de 12 ans	2 €	4 €

*Article 7. Agents dera autoritat e règim disciplinari*

Ena tramitacion des expedients per incompliment d'aquesta regulacion, s'aplicarà eth procediment administratiu sancionador regulat ena normativa vigenta sus aguesta matèria, còssent damb çò que se dispause ena Ordenança generau reguladora.

Entà garantir eth compliment d'aguesta pròva pilot, seràn d'aplicacion es previsions respècte as agents dera autoritat que s'establiessen ena Ordenança generau reguladora.

*Disposicion transitòria*

Un còp agen transcorrut es tèrmes previsti entara aprobacion e publicacion d'aguesta regulacion, s'iniciarà era sua vigéncia, que s'estenerà sonque ath long deth 2016.

Mès enlà dera data referida en art. 4 tornarà a èster vigent era regulacion prèvia.

*Disposicion finau prumèra*

A efèctes d'aplicacion d'aguesta regulacion, e per tot çò que non i sigue previst, s'aplicaràn es definicions e es continguts dera Ordenança generau reguladora vigenta.

Aguesta regulacion s'entenerà aprobada definitivaments un viatge acabat eth mes de publicacion obligatòria sense allegacions contràries. En tot auer-ne-i serà aguest madeish Plen qui en apròbe era sobsanacion.

*Disposicion finau dusau*

Ara finalizacion d'aguesta pròva pilòt, se procedirà a analizar es resultats arthenhuts damb era sua aplicacion, en tot determinar es modificacions que siguen de besonh as efèctes d'aprovar posteriorament era ordenança reguladora que correspongue.”

**Dusau.-** Expausar-la ath public pendent eth tèrme de trenta (30) dies obrants, mejançant anonci en BOP en pannèu d'anoncis e ena sedença electronica dera Corporacion, as efèctes qu'es interessadi poguen presentar reclamacions e/o suggeriments ad aguesta modificacion reglamentària.

**Tresau.-** Notificar aguest acòrd ar Ajuntament de Vielha e Mijaran e ar Ajuntament d'Es Bòrdes ena sua condicion de titolars dera pista objècte d'aguesta regulacion e as efèctes oportuns.

Quatau.- Facultar ath sindic, en nòm e representacion deth Conselh, entara signatura de toti es documents publics e/o privats que siguen de besonh entà her efectives era tramitacion e execucion d'aguesti acòrds.

8au.- APROBACION, SE PROCEDÍS, DERA ATRIBUCION DES COMPETÉNCIES ENTARA RESOLUCION DES VALORACIONS DE DISCAPACITAT E DEPENDENCIA ATH SERVICI ARANÉS DE BENÈSTER E SALUT.-

Eth sindic explique er acòrd que se sotmet a votacion.

Eth conselhèr Mgfc. Sr. Francés X. Boya Alós manifèste qu'eth sòn grop i é pliament d'acòrd e demane qu'era prioritat sigue era dependéncia.

Eth sindic li respon qu'aguesta ei era volentat politica, mès eth tecnic responsable priorizèc era discapacitat.

Cossent damb çò que dispause er article 59.1 dera Lei 1/2015, de 5 de hereuèr, deth regim especiau d'Aran, "*corresponen ath Conselh Generau d'Aran, cossent damb era normativa e era planificacion dera Generalitat, es competéncies següentes en matèria d'accion sociau: (...) b) Era gestion des servicis sociaus especializadi, incluididi es adreçadi ara gent grana, as mainatges e as persones en situacion de dependéncia o damb andicap, e era avaloracion d'aguesti servicis segonets es critèris establidi pera Generalitat*".

Cossent damb aguesta disposicion legau, eth Conselh Generau d'Aran pòt realizar es valoracions de dependéncia e discapacitat, e mès concretament es següentes foncions:

a) Discapacitat:

1. Elaboracion des informes d'avaloracion cossent damb es critèris legaus vigents.
2. Resolucion deth grad de discapacitat e barem corresponent, emetuda peth Conselh Generau d'Aran.

b) Dependéncia:

1. Elaboracion des informes d'avaloracion cossent damb es critèris legaus vigents.
2. Resolucion deth grad de dependéncia e deth PIA, emetudes peth Conselh Generau d'Aran.

Dat qu'ei volentat d'aguest Govèrn deth Conselh Generau d'Aran poder realizar aquestes avaloracions entà agilizar ath maxim era resolucion des expedients atau coma entà poder completar era gestion integrau deth maxim de servicis sociaus en ambit d'Aran.

Dat qu'en vertut der article 5au des estatuts deth Servici Aranés de Benèster e Salut, son foncions d'aguest organisme, entre d'outes, es següentes:

**Article 5.- Foncions**

*1.1. Cossent damb es directriz que fixe eth Conselh Generau d'Aran, en marc dera politica de servicis sociaus dera Generalitat de Catalonha, correspon ath Servici Aranés de Benèster e Salut, er exercici des foncions següentes:*

- a) Eth supòrt tecnic as servicis sociaus basics e era collaboracion enes matèries dera sua competència.*
- b) Era valoracion e diagnòsi des situacions de besonh sociau e d'outes valoracions sociaus especializadas.*
- c) Eth tractament especializat as persones que n'an besonh que non poguen èster atengudes pes servicis sociaus basics.*
- d) Realizar actuacions preventives de situacions de risc e besonh sociau.*
- e) Avalorar e determinar er accès a prestacions economiques.*
- f) Era promocion, establiment e aplicacion de mesures d'insercion sociau, laborau, educativa e familiara.*
- g) Era gestion de centres, equipaments, programes e prestacions especificques des servicis sociaus especializadi.*
- h) Era gestion des servicis sociaus basics que li siguin encomanats pes ajuntaments dera Val d'Aran mejançant era corresponenta encomana de gestion.*
- i) Eth seguiment e era avaloracion des mesures de proteccion e era elaboracion e contròle des plans de melhorament.*
- j) Era coordinacion damb es servicis sociaus basics des ajuntaments dera Val d'Aran.*

Cossent damb çò expausat e vist er article 9.1.c) dera Lei 19/2014, deth 29 de deseme, de Transparéncia, Accés ara Informacion Publica e Bon Govern, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era atribusion dera competència entara emision des resolucions des avaloracions de discapacitat e dependéncia ath Servici Aranés de Benèster e Salut.

Un viatge sotmetuda era prepausa a votacion e debat, s'obtien **tretze (13) vòts a favor** deth sindic e des conselhèrs Mgf. Sr. Luis Carlos Medina Modroño, Mgf. Sr. César Ruiz-Canela Nieto, Mgf. Sr. Francesc Medan Juanmartí, Mgf. Sr. Jose Enrique Arró Cuny, Mgfca. Sra. Anna Diaz Morello, Mgf. Sr. José Antonio Boya Quintana, Mgf. Sr. Francés X. Boya Alós, Mgf. Sr. Francisco Bruna Capel, Mgf. Sr. Amador Marques Atés, Mgfca. Sra. Maria Pérez Vergés, Mgf. Sr. Juan Antonio Serrano Iglesias e Mgf. Sr. José Antonio Bruna Vilanova pera quau causa s'acòrde per *unanimitat* des tretze (13) membres presents deth totau de tretze que formen era Corporacion:

Prumèr.- Atribusir era competéncia entara emision des resolucions des avaloracions de discapacitat e dependéncia ath Servici Aranés de Benèster e Salut.

Dusau.- Er àmbit d'aguesta atribusion compren es foncions següentes:

- a) Discapacitat:
  - 1. Elaboracion des informes d'avaloracion cossent damb es critèris legaus vigents.
  - 2. Resolucion deth grad de discapacitat e barem corresponent, emetuda peth Conselh Generau d'Aran.
  
- b) Dependéncia:
  - 1. Elaboracion des informes d'avaloracion cossent damb es critèris legaus vigents.
  - 2. Resolucion deth grad de dependéncia e deth PIA, emetudes peth Conselh Generau d'Aran.

Tresau.- Publicar aquest acòrd en DOGC, en BOP de Lleida, en pannèu d'anoncis e ena sedença electronica dera Corporacion entath coneishement generau.

Quatau.- Facultar ath sindic, en nòm e representacion deth Conselh, entara signatura de toti es documents publics e/o privats que siguen de besonh entà her efectives era tramitacion e execucion d'aguesti acòrds.

**9au.- RATIFICACION, SE PROCEDÍS, DES REPRESENTANTS DETH CONSELH GENERAU EN ORGANS COLLEGIADI, ERA COMPETÉNCIA DES QUAUS CORRESPON ATH PLEN DETH CONSELH GENERAU D'ARAN.-**

Er article 13 dera Lei 15/1990, de 9 de junhsèga, d'Ordenacion Sanitària, especifica qu'aguest Institut ei format, entre d'auti, per un Conselh de Direccion.

Dat qu'er article 7 dera Lei 11/2011, de 29 de deseme, de reestructuracion deth sector públic entà agilizar era activitat administrativa, modifique er article 13 dera Lei 15/1990, en tot establir ara eth numerò quate dera letra d) der apartat 1 que serà designat "*Eth conselhèr o conselhèra competent en matèria de salut deth Conselh Generau d'Aran*".

Vist er escrit damb registre d'entrada num. 333, de 29 de hereuèr de 2016, deth Aule. Conseller de Salut dera Generalitat de Catalunya en quau sollicite, en vertut deth procés de renovacion des membres deth Conselh de Direcció del Servei Català de la Salut, era designacion dera persona titular e suplent en representacion deth Conselh Generau d'Aran en aquest organ collegiat.

Dat qu'era designacion des representants, en vertut der escrit de sollicitud abans nomenat, s'auie de hèr abans der 1 d'abriu de 2016, per rasons d'urgéncia e mejançant Decret de Sindicatura 066/2016, d'1 de març de 2016, se designèc era representacion deth Conselh Generau d'Aran en Conselh de Direcció deth Servei Català de la Salut.

Dat qu'er organ competent entà adoptar aquest acòrd ei eth Plen deth Conselh Generau d'Aran, e cossent damb çò que dispause era Lei 15/1990, de 9 de junhsèga, d'Ordenacion Sanitària, modificada per Lei 11/2011, de 29 de deseme, de reestructuracion deth sector públic entà agilizar era activitat administrativa, e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era ratificacion coma des nau representants deth Conselh Generau d'Aran en Conselh de Direccion deth *Servei Català de la Salut*.

Un viatge sotmetuda era prepausa a votacion e debat, s'obtien **tretze (13) vòts a favor** deth sindic e des conselhèrs Mgf. Sr. Luis Carlos Medina Modroño, Mgf. Sr. César Ruiz-Canela Nieto, Mgf. Sr. Francesc Medan Juanmartí, Mgf. Sr. Jose Enrique Arró Cuny, Mgfca. Sra. Anna Diaz Morello, Mgf. Sr. José Antonio Boya Quintana, Mgf. Sr. Francés X. Boya Alós, Mgf. Sr. Francisco Bruna Capel, Mgf. Sr. Amador Marques Atés, Mgfca. Sra. Maria Pérez Vergés, Mgf. Sr. Juan Antonio Serrano Iglesias e Mgf. Sr. José Antonio Bruna Vilanova pera quau causa s'acòrde per *unanimitat* des tretze (13) membres presents deth totau de tretze que formen era Corporacion:

Prumèr.- Ratificar coma nau representants deth Conselh Generau d'Aran en Conselh de Direccion deth *Servei Català de la Salut* as persones qu'ara seguida se relacionen:

- Titular: Mgfca. Sra. Anna Díaz Morelló, Conselhera de Benèster deth Conselh Generau d'Aran.
- Suplent: Mgf. Sr. Luis Carlos Medina Modroño, Conselher d'Administracions Publiques, Finances, Coneishement e Transparéncia.

Dusau.- Notificar er acòrd anterior ath Departament de Salut dera Generalitat de Catalunya as efèctes oportuns.

Tresau.- Sosméter aquest nomentament a informacion publica en BOP, en DOGC e en pannèu d'anoncis dera Corporacion as efèctes oportuns.

Quatau.- Facultar ath sindic d'Aran, en nòm e representacion deth Conselh, entara signatura de toti es documents publics e/o privats que siguen de besonh tà her efectives era tramitacion e execucion des acòrds anteriors.

10au.- APROBACION, SE PROCEDÍS, DERA MOCION EN CONTRA DER ACÒRD ENTRE ERA UE E TURQUIA SUS ERA CRISI DE REFUGIATS.-

Era conselheira Mgfca. Sra. Maria Vergés Pérez explique qu'ei ua propòsta qu'eth Fons Català de Cooperació a hèt a arribar a totes es institucions publicas catalanes. Es antecedents parlen clarament deth contengut der acòrd, en tot expausar qu'es acòrds sotmetudi ara consideracion deht Plen son es que propòse eth Fons Català de Cooperació.

Vista era prepausa de mocion presentada peth grop d'UA en Conselh Generau d'Aran.

Eth passat 18 de març eth Conselh Europèu prenec un acòrd que vulnèra era legislacion que protegís as personas refugiades e met eth jòc es drets umans.

Luenh d'aguesta decision prenuda pes caps d'estat, es ajuntaments dan supòrt as personas refugiades en rota, a trauès dera campanha deth Hons Catalan de Cooperacion e trabalhen entara sua integracion tà quan arriben enes municipis de Catalunya, coma exprimís eth president dera Generalitat de Catalonha, ena sua carta ath comissari de Migracions dera UE deth passat 15 de març, ena quau affirme que Catalunya ei premanida entà acuelher ath torn de 4.500 refugiats.

Era cimèra entre es estats dera Union Europèa e Turquia, prèvia ad aguest acòrd, luenh de trobar ua gessuda que garantisque eth respècte des drets umans e se complisque damb era obligacion des estats d'acuelher as sollicitants d'asil, era Union Europèa acordèc era externalizacion de termièras e era subcontractacion d'aguestes responsabilitats ar Estat turc, coma auem ja vist ena termièra sud de Ceuta e Melilla damb eth Marròc o damb es Centres d'Intèrnament entà Estrangèrs dehòra de territòri comunitari, a cambi de 3.000 milions d'èuros addicionaus a compdar de 2018 –ath delà des ja assignadi enquia 2017-, era liberalizacion de visats e auançar ena negociacion dera addesion de Turquia ena UE.

Era solucion qu'a trobat Brusèles entà gestionar era arribada de centenats de milèrs de personas que hugen dera guèrra, dera misèria e d'aute tipe de persecucions ei tripla. Prumèr, evitar que caushiguen solèr europèu damb er increment des operacions de contraròtle de termièras exteriòres damb era participacion militar dera OTAN, dusau, acordar era expulsion tà Turquia d'aqueri que tot e atau poguen arribar enes isles grègues en tot jogar-se era vida en Mediterranèa, e tresau, bloquejar era rota des Balcans cap ath nòrd d'Euròpa qu'en 2015 utilizèren 900.000 personas.

Er acòrd que s'artenh damb Turquia respon exclusivament ara utilizacion des politiques migratòries ath servici d'ua logica securitària qu'arrase damb es supausades valors constitutives europèes de solidaritat e per çò que hè as drets umans. Era execucion deth tèxte aprovat empedís a totes es personas qu'arriben de

forma irregulara en Grècia era possibilitat de sollicitar asil en Euròpa quan non existís ua auta via que non sigue era irregularitat.

Un còp mès vedem coma era UE partís d'ua premissa faussa: blindar es termières d'Euròpa acabarà damb era crisi umanitària ena Mediterranèa. Transportar as personas refugiades e migrants tà un tresau estat non ei acabar damb era crisi umanitària, se non expulsar-la de territòri comunitari, e priorizar es operacions de contraròtle e seguretat en lòc des de sauvament en aigües termierères. Se volem acabar damb eth trafic d'èsters umans e damb es mòrts en Mediterrani, cau voluntat politica en tot garantir vies segures e legaus: visats umanitaris, possibilitat de sollicitar asil enes embaishades e consolats europèus enes païsi d'origina e trànsit, eca.

Es mesures adoptades son un despropòsit, ua mòstra mès deth papèr vergonhós qu'an es estats e es institucions europèes dempús der inici d'aguesta crisi que chòque frontament damb er obligat compliment dera Convencion de Ginèbra e damb er article 19.1 dera Carta de Drets Fonamentaus dera UE, segontes eth quau se proibissen explicitament es expulsions collectives.

Deuant d'ua Euròpa incapabla de dar ua resposta adequada en tot garantir condicions dignes a totes es personas laguens deth territòri pròpri comunitari, coma vedem en Calais, en Ceuta e Melilla, en Dunker o en Idomeni, aué mos torne a tocar díder pro a nosati, en mon locau, ara societat civila organizada, e as ciutadanes e ciutadans d'aguesta Euròpa que mos hè.

Pr'amor d'aguesti motius, eth grop d'UA-PM-PSC en Conselh Generau d'Aran e vist eth dictamen positiu dera Comission Informativa Permanenta de Servicis Generaus deth Conselh Generau d'Aran de data 21 d'abriu de 2016, se prepausa ath Plen era aprobacion dera mocion en contra der acòrd entre era UE e Turquia sus era crisi de refugiats.

Un viatge sotmetuda era prepausa a votacion e debat, s'obtien **tretze (13) vòts a favor** deth sindic e des conselhèrs Mgf. Sr. Luis Carlos Medina Modroño, Mgf. Sr. César Ruiz-Canela Nieto, Mgf. Sr. Francesc Medan Juanmartí, Mgf. Sr. Jose Enrique Arró Cuny, Mgfca. Sra. Anna Diaz Morello, Mgf. Sr. José Antonio Boya Quintana, Mgf. Sr. Francés X. Boya Alós, Mgf. Sr. Francisco Bruna Capel, Mgf. Sr. Amador Marques Atés, Mgfca. Sra. Maria Pérez Vergés, Mgf. Sr. Juan Antonio Serrano Iglesias e Mgf. Sr. José Antonio Bruna Vilanova pera quau causa s'acòrde per *unanimitat* des tretze (13) membres presents deth totau de tretze que formen era Corporacion:

Prumèr.- Demanar ath Congrès qu'exigisque ath Govèrn es foncions que bloquee er acòrd entre era Union Europèa e Turquia que permeterà tornar tà territòri turc as refugiats qu'an arribat en Grècia e que tota negociacion en Conselh Europèu a d'èster subjècta ath respècte des drets umans e eth Dret Internacionau.

Dusau.- Reclamar que se garantisquen vies d'accès ara proteccion internacionau legaus e segures es païsi d'origina e transit e qu'eth govèrn espanyòl assumisque era sua responsabilitat en tot acceptar intègrament es quòtes de persones reubicades e reassentades que li corresponen.

Tresau.- Denonciar era expulsion des ONG que trabalhen en sauvament, acuelhuda e accompagnement des persones refugiades que son en rota en Grècia.

Quatau.- Assegurar eth desplegament deth Plan de Proteccion Internacionau en Catalonha, aprovat peth Conselh de Govèrn dera Generalitat de Catalonha eth passat 28 de gèr de 2014, en tot dotar-lo deth pressupòst adequat e sufisent entà poder implementar es mesures concrètes que remasse, que garantisquen ua acuelhuda establa e de qualitat.

Cincau.- Sostier e colaborar damb es entitats araneses que trabalhen ena acuelhuda e eth servici as personas sollicitantes d'asil.

Siesau.- Trabalhar ena sensibilizacion e eth compromís dera poblacion aranesa en aguest ahèr.

Setau.- Garantir politiques de cooperacion tath desenvolopament damb vocacion transformadora.

Ueitau.- Facultar ath sindic d'Aran, en nòm e representacion deth Conselh, entara signatura de toti es documents publics e/o privats que siguen de besonh tà her efectives era tramitacion e execucion des acòrds anteriors.

11au.- DAR COMPDE DER INFORME DE MOROSITAT E DETH PERIÒDE MIEI DE PAGAMENT DETH CONSELH GENERAU D'ARAN, QUATAU TRIMÈSTRE 2015.-

Er interventor de hons, Sr. Pere Antoni Pascual Francés, informe qu'eth Conselh Generau d'Aran, individualament e de forma consolidada, complís damb eth periòde miei de pagament. Çò que se concludís des numeròs ei que non i a tensions de tresaureria entà pagar as proveïdors.

Eth conselhèr Mgfc. Sr. Francés X. Boya Alós salude ar interventor –pr'amor dera sua recenta incorporacion- e demane aclariment de qüestions que preguntaràn per escrit sus determinades factures pagades.

Eth conselhèr Mgfc. Sr. José Antonio Bruna Vilanova pregunte per un projècte de dinamizacion des productes dera mèrca de garantia.

Era conselhèra Mgfca. Sra. Anna Díaz Morelló explique que se tracte de cercar era forma d'externalizar era comercializacion des productes dera mèrca de garantia coma part dera mèrca Val d'Aran.

Eth conselhèr Mgc. Sr. José Antonio Bruna Vilanova pregunte peth totau deth patrocini der Snowfest.

Era conselhèra Mgfca. Sra. Anna Díaz Morelló li respon que se promocionèc per tres vies: promocion a trauèrs des canaus abituaus de promocion; aportacion dirècta deth Conselh Generau d'Aran; e canalizacion deth finançament dera Diputació de Lleida destinat ar eveniment.

Dat qu'er article 4 dera Lei 15/2010, de 5 de junhsèga, de modificacion dera Lei 3/2004, de 29 de deseme, pera quau s'establissen mesures de luta contra era morositat enes operacions comercials, establís que *“los Tesoreros o, en su defecto, Interventores de las Corporaciones locales elaborarán trimestralmente un informe sobre el cumplimiento de los plazos previstos en esta Ley para el pago de las obligaciones de cada Entidad local, que incluirá necesariamente el número y cuantía global de las obligaciones pendientes en las que se esté incumpliendo el plazo”* en tot establir era obligacion de dar-ne compde en Plen dera Corporacion, ath delà de remeter-la *“a los órganos competentes del Ministerio de Economía y Hacienda y, en su respectivo ámbito territorial, a los de las Comunidades Autónomas que, con arreglo a sus respectivos Estatutos de Autonomía, tengan atribuida la tutela financiera de las Entidades locales. Tales órganos podrán igualmente requerir la remisión de los citados informes”*.

Dat qu'er article 5 dera nomentada norma dispause que *“la Entidad local dispondrá de un registro de todas las facturas y demás documentos emitidos por los contratistas a efectos de justificar las prestaciones realizadas por los mismos, cuya gestión corresponderá a la Intervención u órgano de la Entidad local que tenga atribuida la función de contabilidad”*, en tot híger que *“la Intervención u órgano de la Entidad local que tenga atribuida la función de contabilidad incorporará al informe trimestral al Pleno regulado en el artículo anterior, una relación de las facturas o documentos justificativos con respecto a los cuales hayan transcurrido más de tres meses desde su anotación en el citado registro y no se hayan tramitado los correspondientes expedientes de reconocimiento de la obligación o se haya justificado por el órgano gestor la ausencia de tramitación de los mismos. El Pleno, en el plazo de 15 días contados desde el día de la reunión en la que tenga conocimiento de dicha información, publicará un informe agregado de la relación de facturas y documentos que se le hayan presentado agrupándolos según su estado de tramitación”*.

Vist er informe dera Tresaureria deth Conselh Generau d'Aran, de data 15 d'abriu de 2016, sus eth compliment des obligacions deth Conselh Generau d'Aran e des organismes autonòms locaux *“Foment Torisme Val d'Aran”* e *“Servici Aranés de Benèster e Salut”* e de morositat des tres, damb es annèxes d'estat de pagament.

Cossent damb çò expausat, se da compde ath Plen deth Conselh Generau d'Aran der informe trimestrau sus eth compliment des tèrmes previsti ena Lei 15/2010, de 5 de junhsèga, de modificacion dera Lei 3/2004, de 29 de deseme, pera quau s'establissen mesures de luta contra era morositat enes operacions comerciaus, entath pagament des obligacions de cada Entitat Locau.

Eth Plen deth Conselh se'n da per assabentat.

12au.- AHÈRS D'URGÈNCIA.-

Non n'i a.

13au.- PRECS E DEMANES.-

Eth conselhèr Mgfc. Sr. Francés X. Boya Alós explique qu'ara se complissen vint-e-cinc ans dera restauracion deth Conselh Generau d'Aran e cre que calerie hèr ua analisi der estat dera qüestion. Calerie, ath sòn entèner, hèr un debat entà arribar a acòrds entà trapar consensi de país a traucers d'un plen extraordinari en quau se plantègen es reptes mès importants de futur entath Conselh Generau d'Aran. serie monografic e abans deth 17 de junh. En aguest sens, liure era peticion de plen ath secretari generau dera Corporacion.

En un aute orde de causes, pregunte pes acòrds publics artenhuts ena amassada deth sindic damb eth president dera Generalitat.

Eth sindic explique qu'en aquera amassada eth desvolopament dera Lei d'Aran. Li demanèc que l'informèsse se era Generalitat de Catalunya treballaue en ua naua constitucion, ara quau causa li responèc que non. Atau madeish li sollicitèc qu'en moment que se plantegèsse era redaccion d'ua naua constitucion entà Catalonha, que'era Val d'Aran volie manifestar era sua volentat d'èster. S'acordèc que quan se cree era comission, era Generalitat de Catalunya ac notificarà formalament ath Conselh Generau d'Aran.

Atau madeish, explique que sollicitèc ath president un impuls dera comission mixta e comentèc eth tèma deth finançament e eth besonh de superar eth sistèma d'imposicions deth Departament d'Economia enquia ara. Per auta part, li recordèc es deutes pendants, ara demora d'exigir-ne eth pagament quan es finances dera Generalitat de Catalunya mielhoressen.

Per aute costat, requeric priorizar er increment de places geriatriques ena Val d'Aran, dat eth deficit actuau. Fin finau, eth president confirmèc era sua assistència as actes institucionaus dera Hèsta d'Aran d'aguest an.

Eth conselhèr Mgfc. Sr. Francés X. Boya Alós pregunte se eth deute dera Generalitat de Catalunya damb eth Conselh Generau d'Aran ei de 7,5 milions d'èuros, coma publicaue eth diari Segre hè uns dies.

Eth sindic considere qu'aguesta estimacion non se correspon damb era realitat e qu'es mieis de comunicacion non coneishen era realitat dera intervencion deth Conselh Generau d'Aran.

Eth conselhèr Mgfc. Sr. Francés X. Boya Alós assegure qu'era Generalitat de Catalunya non complís damb era Lei d'Aran, qu'exigís pactar un hons de finançament entath Conselh Generau d'Aran. Manten que cau regularizar era forma de pagament ath Conselh Generau d'Aran, dat qu'ac considèrè prioritari. Afirmè que cau hèr un analisi der estat de compliment dera Lei d'Aran.

Ara seguida, pregunte pera reintroduccion deth linx europèu ena Val d'Aran coma pròva pilòt. Demane com està aguest ahèr, pr'amor qu'as pagesi non se les paguen es ajuts europèus e per auta part i a sòs entà depen de quines causes. Eth sòn grop ei a favor dera biodiversitat mès considèrè qu'era reintroduccion d'espècies depredadores obliga ath consens e ara reflexion.

Concludís que cau consens deth territòri entad aquestes mesures damb es propietaris des forests e des agropacions ramadèras afectades.

Eth sindic explique qu'eth Ministerio de Agricultura se metec en contacte damb eth Conselh Generau d'Aran e eth Conselh demanèc qu'era prepausa arribèsse per escrit. Ena amassada dera biomassa se liurèc as ajuntaments e EMD un brolhon dera prepausa, que tanben se remetec as associacions ramadèras e societats de caça e pesca. Dauant dera possible afectacion as ramats de oelhes se demanèc que se poguesse identificar clarament es atacs. S'exigic ath delà consens, que ven remassat ena prepausa mejançant ua comission dera quau ne formen part es sectors afectadi.

Concludís que tota era prepausa ei en document e se quedèc qu'es ajuntaments presentarien es sues consideracions ath respècte, dera quau causa s'ei ara demora. Explique qu'un ajuntament dejà i é d'acòrd e manifèste qu'er objectiu dera mesura ei reequilibrar er estat de predadors, atau coma reequilibrar de forma naturala er estat d'ungulats, coma ara es cèrvi. Insistís qu'an fòrça clar que se non i a consens non i a projècte.

Eth conselhèr Mgfc. Sr. Francés X. Boya Alós argumente que les semble ben, mès vòlen qu'abans que se prengue cap de mesura en aguest sens se consensue en país, pr'amor qu'ath delà era ramaderia ei fòrça perjudicada, especialament per espaci agrari ath torn des pòbles.

Eth sindic reitere eth sòn acòrd totau en besonh de consens.

Era conselhèra Mgfc. Sra. Maria Vergés Pérez expòse qu'Adigsa gestiones es peticions de viuenda quan i a desnonaments. Indique qu'ara madeish es casi se pòrten des de Barcelona e aqui se va ath limit pera acumulacion. Çò revertís ena

gestion des casi que se produïssen ena Val d'Aran, coma eth darrèr que s'a produsit en Vielha. En aguest sens, era sua peticion ei qu'eth Conselh Generau d'Aran pogue hèr es gestions entà qu'aguesti casi se tornen a tramitar des dera delegacion territoriala en Lhèida.

Per aute costat, expòse qu'en un plen se comentèc qu'er Ajuntament de Vielha e Mijaran demanaue un professor d'aranés entara escòla mairau e encara non an responsa.

Eth sindic li respon que compdaue damb que se tractaue aguest darrèr d'un ahèr resolut. Se compromet a gestiona'c entara sua rapida resolucion.

Eth conselhèr Mgfc. Sr. José Antonio Bruna Vilanova pregunte pera partida d'apraiment de camins prevista en projècte de pressupòst tath 2016. Demane en concret per Valarties e Aiguamòg e se i a prevision entà apraiar-les peth sòn naut valor toristic e eth sòn mau estat.

Eth sindic li conteste que non li conste era quantitat prevista ena partida.

Eth conselhèr Mgfc. Sr. José Antonio Bruna Vilanova pregunte se seguís era pròva pilòt de visites mediques en Cap dera Vila.

Eth sindic li respon que finalizèc hè un an.

E en non auer mès ahèrs a tractar, se lhèue era session tàs tretze ores e cinquanta cinc minutes deth dia vint-e-cinc d'abriu de dus mil setze, dera quau s'estien aguesta acta signada peth sindic e jo, eth secretari generau, que ne dongui fe.

Eth secretari generau

Vist e platz  
Eth sindic